

Jon a teater!

Taca ite en sabeda ai 27 de otober la rassegna endrezèda dal Comun general de Fascia con duc i gropes de la val

Teater - Emozion fona, jech gustegol e spas arsegurà. Chest l'é chel che vegn sport via per dut uton dai gropes de teater de Fascia che tol pèrt a la rassegna endrezèda dal Comun general de Fascia. Da en sabeda ai 27 de otober fin a domenìa ai 16 de dezember se podarà se goder n moment de svampol fora per i teatres de duta la val. Tolan pèrt a chisc apuntamenc se podarà venjer ence n bel pest ajache endèna la rassegna vegnarà dat fora na tessera olache a ogne spetacol ge vegnarà metù sù n stempel. La tesseres empienides con i stempei de duta la comedies les vegnarà tirèdes a la brusca per ciapèr i pesc' che à metù a la leta l Comun general de Fascia. L prum spetacol vegn portà dant apontin en sabeda ai 27 de otober te chino Marmolèda de Cianacei da les 20.30. La rassegna taca ite con la proponeta de la Scola Ladina de Fascia e de l'Istitut cultural ladin che porta dant na opera da camera de Igor Stravinskij (1918) dal titol "La storia del sudà" dal libret de Charles-Ferdinand Ramuz. N moment dedicà a la riflascion olache la capacità e la sensibilità di letores del grop "Batadoes de bron" vegn compagnèda da la competenza de la orchestra reta dal maester Kasper De Roo.

Se jirà inant dapò en vender ai 9 de november da les 20.30 te teater de l'Oratorie de Poza e en domenìa ai 11 de november da les 15.30 a La Gran Ciasa de Soraga con n spetacol dut da grignèr del grop di jocolieres petrignousc de "INOUT TEAnTER" che portarà dant "L circo di talenc".

L grop da Moena "I Amisc del teater" spilenarà la comedia "Da na bujia a l'otra" en vender ai 16 de november te chino Marmolèda da les 20.30 e en domenìa ai 18 de november da les 15.30 te teater de l'Oratorie de Moena. Dapò sarà l moment del Grop



L CGF à endrezà na rassegna de teater.

de la Mèsces de Dèlba e Penia che portarà dant "Na srufianèda 2" te la veia scoles de Penia en vender ai 23 da sera e en domenìa ai 25 de november domesdi. Amò sarà l grop La Mizacoles da Ciampedel che spilenarà l toch "Se fae inant l più ascort" en vender ai 30 de november al PalaDolomites de Ciamepestrin da les 20.30 e en domenìa ai 2 de dezember domesdi te teater de Ciampedel. Etres doi gropes tolarà pèrt amò a la rassegna de teater del Comun general de Fascia. I Bontemponi da Poza con l toch da grignèr "La ciampènes de la sabeda sènta" che i spilenarà en vender ai 7 de dezember te teater de Ciampedel e en domenìa ai 9 de Oratorie de Poza.

E tinultima sarà l Grop Antermoia che metarà a jir l spetacol dal titol "Vijita de condolianzes" en vender ai 14 de dezember te Oratorie de Moena e en domenìa ai 16 al PalaDolomites de Ciamepestrin.

En ocajion del prum spetacol, en sabeda ai 27 de otober, vegnarà fat la premiazion de "Kunst ladin" l concurs de schertura de toc de teater per ladin. A duc i spetacoi l'entrèda la é con bonaman per la Cèsa de Pausa. (mci)